



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et de la Biodiversité

Äntwert vum Minister fir Ëmwelt, Klima a Biodiversitéit op d'parlamentaresch Fro n°2819 vum 28. August 2025 vun den éierewäerten Deputéierten Madamm Alexandra Schoos an Här Jeff Engelen iwwert d' "Impact des espèces animales invasives sur la nature et l'environnement"

Kann den Här Minister déi eenzel Déierenzorten opschlësselen, déi zu Lëtzebuerg als invasiv gëllen?

Wéi vill invasiv Déierezorte sinn zanter 1990 nei zu Lëtzebuerg opetaucht an ëm wéi eng Déierezorten handelt et sech?

Et si bis lo 86 invasiv exotesch Déierenaarten zu Lëtzebuerg nogewise ginn, opgedeelt a 27 Wirbeldéieren a 59 Wirbeloser. D'Lëscht sinn op www.neobiota.lu ze fannen. All Joer gi nei invasiv Aarten zu Lëtzebuerg festgestallt, wéi zum Beispill déi Asiatesch Runn (*Vespa velutina nigrithorax*) am Joer 2021 oder 2022 déi Asiatesch Tigerméck (*Aedes albopictus*).

Kann den Här Minister präziséieren an opschlësselen, wéi vill vun all deenen invasiven Déierenzorten e probemateschen Impakt op eis heemesch Natur an Ëmwelt hunn a wat genau den Impakt op eis Natur an Ëmwelt ass vun deene respektiven Déierenzorten?

Op der EU-Lëscht vun den invasiven exoteschen Aarten¹ sinn et 11 vun de Wirbeldéieren a 5 Wirbeloser déi zu Lëtzebuerg virkommen. D'EU-Reglement 1143/2014 *relatif à la prévention et à la gestion de l'introduction et de la propagation des espèces exotiques envahissantes* gëtt kloer Krittäre vir wéini eng nei Aart op d'EU-Lëscht kann opgeholl ginn. An der Risikoanalys gëtt, baséiert op den disponibele wëssenschaftlechen Erkenntnisser, gekuckt wéi d'Dynamik vun Introductioun, Reproduktioun a Propagatioun ass, souwéi déi negativ Impakter op d'Biodiversitéit an déi ofhängeg Ökosystemer.

Als Beispill vu negativem Impakt vun invasiven exoteschen Déierenaarten hei zu Lëtzebuerg sief bei de Wirbeldéieren d'Nutria (*Myocastor coypus*) genannt, ee Nagedéier wat ursprüngelech aus Südamerika staamt. Dës Déier ka bei héije Populationsdichten a sensibele Gebidder quasi d'ganz Vegetatioun opfriesen, an doduerch de Liewensraum fir vill eenheemesch Aarten zerstéieren. De Bisam (*Ondatra zibethicus*), eng grouss Wullmausaart mat Ursprung a Nordamerika, ka lokal e grouse Problem fir eenheemesch Muschelaarten ewéi déi europawäit geschützte Flosspärelmuschel a Baachmuschel duerstellen. De Wäschbier (*Procyon lotor*), méttlerweil am ganze Land verbreet ka lokal zu engem massive Problem fir verschidde Vullenaarten an Amphibiopopulationen ginn. Ganz problematesch ass och d'Schmuckschildkröt (*Trachemys scripta*), déi oft vu Mënschen als Hausdéier gehale gëtt an dann ausgesat gëtt. Dës Aart ka sech duerch Predatioun negativ op d'Amphibiopopulationen auswierken. Bei de Vulle stécht sécherlech d'Nilgäns (*Alopochen aegyptiaca*) eraus, déi sech an de leschte Jore massiv verbreet huet, an als Konkurrent vun anere Wasservulle gëllt.

¹ Règlement d'exécution (UE) 2025/1422 du 17 juillet 2025 modifiant le règlement d'exécution (UE) 2016/1141 pour mettre à jour la liste des espèces exotiques envahissantes préoccupantes pour l'Union.

Bei de Wirbellosen sinn op éischer Plaz déi invasiv Kriibsaarten ze nennen, déi eis eenheemesch Kriibsen duerch d'Aschleefe vun der Kriibspescht verschwanne gedoen hunn. Do ass besonnesch de Signalkriib (*Pacifastacus leniusculus*) ze nennen, deen zënter de 1960er an 1970er Joren duerch aktiv Besatzmoossnamen a Mëtteleuropa an och bei eis a Baachen a Flëss agefouert gouf. Des Weidere sief déi Asiatesch Runn (*Vespa velutina nigrithorax*) erwäant, déi sech säit 2023 massiv ausbreet, mee där hiren Impakt op déi heemesch Fauna wëssenschaftlech nach net beluecht ass.

Am Fall wou invasiv Déierenzorten e schiedlechen Impakt op eis Natur an Ëmwelt hunn: Wat gëtt aktuell ënnerholl, fir dogéint virzegoen a mat wéi engem Resultat?

De Ministère fir Ëmwelt, Klima a Biodiversitéit an d'Naturverwaltung hunn, an Zesummenaarbecht mat aneren Acteuren, eng ganz Partie Aktiounspläng erstallt, duerch deenen hier Ëmsetzung d'Verbreedung vun invasiven Aarte soll agedämmt, respektiv hier Progressioun soll gebremst ginn. Dës Pläng sinn all op www.emwelt.lu ze fannen. Dës Pläng gi reegelméisseg op Basis vu neien Erkenntnisser iwwerschaaft. D'Ausschaffe vun den Aktiounspläng duerchleeft all Kéiers eng Consultation publique, bei där all Biergerin a Bierger kënnen hier Remarken eraginn.

Wéi schätzt den Här Minister déi weider Entwécklung an, wat den Impakt vun den invasiven Déierenzorten op eis heemesch Natur an Ëmwelt ugeet?

Weltwäit stellen invasiv Aarte nieft der Zerstéierung, der Degradatioun an der Fragmentéierung vu Liewensraum ee vun de gréisste Problemer am Natur- an Aarteschutz duer. Eng efficace Bekämpfung ass allerdéngs a ville Fäll extrem schwier, well se massiv Ressource verschlénkt, déi vill Länner net hunn. Och zu Lëtzebuerg wäert et schwéier ginn, d'Verbreedung vun deenen Aarten ze stoppen.

Lëtzebuerg, den 7. Oktober 2025
(s.) Serge Wilmes
Minister fir Ëmwelt, Klima a Biodiversitéit